

南無楞嚴會上佛菩薩（三稱）

大佛頂如來密因修證了義諸菩薩萬行首楞嚴經卷第四

爾時，富樓那彌多羅尼子在大眾中，即從座起偏袒右肩，右膝著地，合掌恭敬而白佛言：「大威德世尊！善為眾生敷演如來第一義諦。世尊常推說法人中我為第一，今聞如來微妙法音，猶如聾人逾百步外聆於蚊蚋，本所不見何況得聞？佛雖宣明令我除惑，今猶未詳斯義究竟，無疑惑地。世尊！如阿難輩，雖則開悟習漏未除；我等會中登無漏者，雖盡諸漏，今聞如來所說法音，尚紆疑悔。世尊！若復世間一切、根塵，陰、處、界等，皆如來藏清淨本然，云何忽生山河大地，諸有為相？次第遷流終而復始？又如來說地、水、火、風本性圓融，周徧法界湛然常住。世尊！若地性徧，云何容水？水性周徧火則不生，復云何明水火二性，俱徧虛空，不相陵滅？世尊！地性障礙，空性虛通，云何二俱周徧法界？而我不知是義攸往，惟願如來宣流大慈，開我迷雲及諸大眾。」作是語已，五體投地，欽渴如來無上慈誨。

爾時，世尊告富樓那及諸會中，漏盡無學諸阿羅漢：「如來今日，普為此會宣勝義中，真勝義性。令汝會中，定性聲聞及諸一切未得二空，回向上乘阿羅漢等，皆獲一乘寂滅場地，真阿練若正修行處。汝今諦聽，當為汝說。」富樓那等欽佛法音，默然承聽。

佛言：「富樓那！如汝所言，清淨本然，云何忽生山河大地？汝常不聞如來宣說，性覺妙明、本覺明妙？」

富樓那言：「唯然，世尊！我常聞佛宣說斯義。」

佛言：「汝稱覺明，為復性明，稱名為覺？為覺不明，稱為明覺？」

富樓那言：「若此不明，名為覺者，則無所明？」

佛言：「若無所明，則無明覺，有所非覺，無所非明，無明又非覺湛明性。性覺必明，妄為明覺；覺非所明，因明立所。所既妄立，生汝妄能；無同異中，熾然成異，異彼所異，因異立同，同異發明，因此復立，無同無異。如是擾亂相待生勞，勞久發塵，自相渾濁，由是引起塵勞煩惱，起為世界。靜成虛空，虛空為同，世界為異，彼無同異，真有為法。覺明空昧相待成搖，故有風輪執持世界；因空生搖，堅明立礙，彼金寶者，明覺立堅，故有金輪保持國土；堅覺寶成，搖明風出，風金相摩，故有火光為變化性。寶明生潤，火光上蒸，故有水輪含十方界；火騰水降，交發立堅，濕為巨海，乾為洲渾，以是義故，彼大海中，火光常起，彼洲渾中江河常注，水勢劣火結為高山，是故山石擊則成燄，融則成水，土勢劣水抽為草木，是故林藪遇燒成土，因絞成水。交妄

發生，遞相為種，以是因緣世界相續。

復次，富樓那！明妄非他，覺明為咎。所妄既立，明理不踰，以是因緣，聽不出聲，見不超色，色、香、味、觸，六妄成就，由是分開見、覺、聞、知。同業相纏，合離成化，見明色發，明見想成，異見成憎，同想成愛，流愛為種，納想為胎，交邁發生，吸引同業，故有因緣，生羯羅藍，遏蒲曇等，胎、卵、濕、化，隨其所應，卵惟想生、胎因情有、濕以合感、化以離應，情想合離，更相變易，所有受業，逐其飛沈，以是因緣眾生相續。

富樓那！想愛同結，愛不能離，則諸世間父母子孫，相生不斷，是等則以欲貪為本；貪愛同滋，貪不能止，則諸世間，卵、化、濕、胎，隨力強弱，遞相吞食，是等則以殺貪為本；以人食羊，羊死為人，人死為羊。如是乃至十生之類，死死生生互來相瞰，惡業俱生，窮未來際，是等則以盜貪為本。汝負我命，我還汝債，以是因緣，經百千劫常在生死；汝愛我心，我憐汝色，以是因緣，經百千劫常在纏縛。惟殺、盜、淫，三為根本，以是因緣，業果相續。富樓那！如是三種顛倒相續，皆是覺明，明了知性，因了發相，從妄見生山河大地，諸有為相次第遷流，因此虛妄，終而復始。」

富樓那言：「若此妙覺，本妙覺明，與如來心不增不減。無

狀忽生山河大地，諸有為相。如來今得妙空明覺，山河大地有為習漏，何當復生？」

佛告富樓那：「譬如迷人，於一聚落惑南為北，此迷為復因迷而有？因悟而出？」

富樓那言：「如是迷人，亦不因迷，又不因悟。何以故？迷本無根，云何因迷？悟非生迷，云何因悟？」

佛言：「彼之迷人正在迷時，倏有悟人指示令悟。富樓那！於意云何？此人縱迷於此聚落，更生迷不？」

「不也，世尊！」

「富樓那！十方如來亦復如是。此迷無本，性畢竟空，昔本無迷，似有迷覺，覺迷迷滅，覺不生迷。亦如翳人見空中華，翳病若除，華於空滅；忽有愚人，於彼空華所滅空地，待華更生。汝觀是人，為愚為慧？」

富樓那言：「空元無華，妄見生滅，見華滅空，已是顛倒，敕令更出，斯實狂癡。云何更名，如是狂人，為愚為慧？」

佛言：「如汝所解，云何問言：『諸佛如來妙覺明空，何當

更出山河大地？』又如金鑛雜於精金，其金一純更不成雜，如木成灰不重為木。諸佛如來菩提涅槃，亦復如是。

富樓那！又汝問言：『地、水、火、風，本性圓融，周徧法界，疑水、火性，不相陵滅；又徵虛空及諸大地，俱徧法界不合相容。』富樓那！譬如虛空，體非羣相，而不拒彼諸相發揮。所以者何？富樓那！彼太虛空，日照則明、雲屯則暗、風搖則動、霽澄則清、氣凝則濁、土積成霾、水澄成映。於意云何？如是殊方，諸有為相，為因彼生？為復空有？若彼所生，富樓那！且日照時既是日明，十方世界同為日色，云何空中更見圓日？若是空明，空應自照，云何中宵、雲霧之時不生光耀？當知是明，非日非空，不異空日。觀相元妄無可指陳，猶邀空華結為空果，云何詰其相陵滅義？觀性元真惟妙覺明，妙覺明心，先非水火，云何復問不相容者？真妙覺明亦復如是。汝以空明，則有空現，地、水、火、風各各發明，則各各現，若俱發明，則有俱現，云何俱現？富樓那！如一水中現於日影，兩人同觀水中之日，東西各行則各有日，隨二人去，一東一西先無準的，不應難言：『此日是一，云何各行？各日既雙，云何現一？』宛轉虛妄，無可憑據。

富樓那！汝以色空，相傾相奪於如來藏，而如來藏，隨為色空周徧法界。是故於中風動、空澄、日明、雲暗，眾生迷悶

，背覺合塵，故發塵勞，有世間相。我以妙明，不滅不生合如來藏，而如來藏，惟妙覺明圓照法界，是故於中，一為無量、無量為一，小中現大、大中現小，不動道場，徧十方界，身含十方無盡虛空，於一毛端現寶王剎，坐微塵裏轉大法輪，滅塵合覺，故發真如妙覺明性。而如來藏本妙圓心，非心非空；非地非水非風非火；非眼非耳鼻舌身意；非色非聲香味觸法；非眼識界，如是乃至非意識界；非明無明、明無明盡；如是乃至非老非死、非老死盡；非苦非集非滅非道；非智非得；非檀那、非尸羅、非毘梨耶、非羼提、非禪那、非般刺若、非波羅密多；如是乃至，非怛闍阿竭、非阿羅訶、三耶三菩；非大涅槃，非常非樂非我非淨，以是俱非世出世故。即如來藏元明心妙，即心即空；即地即水即風即火；即眼即耳鼻舌身意；即色即聲香味觸法；即眼識界，如是乃至即意識界；即明、無明，明、無明盡，如是乃至即老即死，即老死盡；即苦即集即滅即道；即智即得；即檀那、即尸羅、即毘梨耶、即羼提、即禪那、即般刺若、即波羅密多；如是乃至即怛闍阿竭、即阿羅訶、三耶三菩；即大涅槃，即常、即樂、即我、即淨。以是俱即世、出世故，即如來藏妙明心元。離即離非，是即非即。如何世間，三有眾生及出世間聲聞、緣覺，以所知心，測度如來無上菩提，用世語言入佛知見？譬如琴、瑟、箏、篪、琵琶，雖有妙音，若無妙指終不能發。汝與眾生，亦復如是。寶覺真心各各圓滿，如我按指，海印發光，汝暫舉心，塵勞先起，由不勤求無上覺道，

愛念小乘得少為足。」

富樓那言：「我與如來寶覺圓明，真妙淨心無二圓滿。而我昔遭無始妄想，久在輪迴，今得聖乘猶未究竟。世尊！諸妄一切圓滅，獨妙真常，敢問如來，一切眾生何因有妄，自蔽妙明，受此淪溺？」

佛告富樓那：「汝雖除疑，餘惑未盡。吾以世間現前諸事，今復問汝。汝豈不聞，室羅城中演若達多，忽於晨朝以鏡照面，愛鏡中頭，眉目可見，瞋責己頭不見面目，以為魑魅無狀狂走。於意云何？此人何因無故狂走？」

富樓那言：「是人心狂，更無他故。」

佛言：「妙覺明圓，本圓明妙，既稱為妄，云何有因？若有所因，云何名妄？自諸妄想，展轉相因，從迷積迷，以歷塵劫，雖佛發明，猶不能返，如是迷因，因迷自有，識迷無因，妄無所依，尚無有生，欲何為滅？得菩提者，如寤時人說夢中事，心縱精明，欲何因緣取夢中物，況復無因本無所有。如彼城中演若達多，豈有因緣自怖頭走？忽然狂歇，頭非外得，縱未歇狂，亦何遺失。富樓那！妄性如是，因何為在？汝但不隨分別世間、業果、眾生三種相續，三緣斷故，三因不生。則汝心中演若達多，狂性自歇，歇即菩提。勝淨明

心本周法界，不從人得，何藉劬勞，肯緊修證。

「譬如有人於白衣中，繫如意珠不自覺知，窮露他方乞食馳走，雖實貧窮，珠不曾失。忽有智者，指示其珠，所願從心致大饒富，方悟神珠非從外得。」

即時，阿難在大眾中，頂禮佛足起立白佛：「世尊！現說殺盜婬業，三緣斷故三因不生，心中達多狂性自歇，歇即菩提，不從人得。斯則因緣皎然明白，云何如來頓棄因緣？我從因緣心得開悟。世尊！此義何獨我等年少，有學聲聞，今此會中大目犍連，及舍利弗、須菩提等，從老梵志聞佛因緣，發心開悟，得成無漏。今說菩提不從因緣，則王舍城拘舍梨等，所說自然成第一義。唯垂大悲，開發迷悶。」

佛告阿難：「即如城中演若達多，狂性因緣若得除滅，則不狂性，自然而出因緣、自然，理窮於是。阿難！演若達多頭本自然，本自其然，無然非自，何因緣故怖頭狂走？若自然頭，因緣故狂，何不自然，因緣故失？本頭不失，狂怖妄出，曾無變易，何藉因緣？本狂自然，本有狂怖，未狂之際，狂何所潛？不狂自然，頭本無妄，何為狂走？若悟本頭，識知狂走，因緣自然，俱為戲論。是故我言：三緣斷故，即菩提心。菩提心生，生滅心滅，此但生滅，滅生俱盡，無功用道。若有自然，如是則明自然心生，生滅心滅，此亦生滅，

無生滅者名為自然。猶如世間諸相雜和，成一體者，名和合性；非和合者，稱本然性。本然非然，和合非合，合、然俱離，離合俱非，此句方名，無戲論法。菩提、涅槃尚在遙遠，非汝歷劫辛勤修證，雖復憶持十方如來、十二部經，清淨妙理如恒河沙，祇益戲論。汝雖談說因緣自然，決定明了，人間稱汝多聞第一。以此積劫多聞熏習，不能免離摩登伽難。何須待我佛頂神咒，摩登伽心姪火頓歇，得阿那含，於我法中成精進林，愛河乾枯令汝解脫。是故阿難！汝雖歷劫，憶持如來祕密妙嚴，不如一日修無漏業，遠離世間憎、愛二苦；如摩登伽宿為姪女，由神咒力銷其愛欲，法中今名，性比丘尼，與羅睺母耶輸陀羅，同悟宿因。知歷世因貪愛為苦，一念熏修無漏善故，或得出纏、或蒙授記。如何自欺，尚留觀聽。」

阿難及諸大眾聞佛示誨，疑惑銷除心悟實相，身意輕安得未曾有，重復悲淚頂禮佛足，長跪合掌而白佛言：「無上大悲清淨寶王善開我心，能以如是種種因緣方便提獎，引諸沈冥出於苦海。世尊！我今雖承如是法音，知如來藏，妙覺明心徧十方界，含育如來十方國土，清淨寶嚴妙覺王剎；如來復責多聞無功，不逮修習。我今猶如旅泊之人，忽蒙天王賜與華屋，雖獲大宅要因門入。惟願如來不捨大悲，示我在會諸蒙暗者捐捨小乘，畢獲如來無餘涅槃本發心路。令有學者，從何攝伏疇昔攀緣，得陀羅尼入佛知見。」作是語已，五體

投地，在會一心佇佛慈旨。

爾時，世尊哀愍會中緣覺、聲聞，於菩提心未自在者，及為當來佛滅度後末法眾生，發菩提心，開無上乘妙修行路，宣示阿難及諸大眾：「汝等決定發菩提心，於佛如來妙三摩提不生疲倦，應當先明，發覺初心二決定義。云何初心，二義決定？

阿難！第一義者，汝等若欲捐捨聲聞，修菩薩乘入佛知見，應當審觀因地發心與果地覺，為同？為異？阿難！若於因地，以生滅心為本修因，而求佛乘不生不滅，無有是處。以是義故，汝當照明諸器世間，可作之法皆從變滅。阿難！汝觀世間，可作之法誰為不壞？然終不聞爛壞虛空。何以故？空非可作，由是始終無壞滅故。則汝身中堅相為地、潤溼為水、煖觸為火、動搖為風，由此四纏，分汝湛圓妙覺明心，為視、為聽、為覺、為察，從始入終五疊渾濁。云何為濁？阿難！譬如清水清潔本然，即彼塵土灰砂之倫，本質留礙，二體法爾，性不相循。有世間人，取彼土塵投於淨水，土失留礙水亡清潔，容貌汨然，名之為濁。汝濁五重，亦復如是。

阿難！汝見虛空徧十方界，空見不分；有空無體、有見無覺，相織妄成，是第一重，名為劫濁。汝身現搏，四大為體，見、聞、覺、知，壅令留礙，水、火、風、土，旋令覺知，

相織妄成，是第二重，名為見濁。又汝心中憶識誦習，性發知見，容現六塵，離塵無相，離覺無性，相織妄成，是第三重，名煩惱濁。又汝朝夕生滅不停，知見每欲留於世間，業運每常遷於國土，相織妄成，是第四重，名眾生濁。汝等見聞，元無異性，眾塵隔越，無狀異生，性中相知、用中相背，同異失準，相織妄成，是第五重，名為命濁。

阿難！汝今欲令見、聞、覺、知遠契如來，常、樂、我、淨，應當先擇死生根本，依不生滅圓湛性成，以湛旋其虛妄滅生，伏還元覺，得元明覺，無生滅性，為因地心，然後圓成果地修證。如澄濁水貯於淨器，靜深不動，沙土自沈清水現前，名為初伏客塵煩惱；去泥純水，名為永斷根本無明。明相精純，一切變現不為煩惱，皆合涅槃清淨妙德。

第二義者，汝等必欲發菩提心，於菩薩乘生大勇猛，決定棄捐諸有為相，應當審詳煩惱根本，此無始來發業潤生，誰作？誰受？阿難！汝修菩提，若不審觀煩惱根本，則不能知虛妄根塵；何處顛倒，處尚不知，云何降伏，取如來位？阿難！汝觀世間解結之人，不見所結，云何知解？不聞虛空，被汝隳裂。何以故？空無形相，無結解故。則汝現前眼耳鼻舌及與身心，六為賊媒，自劫家寶。由此無始，眾生世界生纏縛故，於器世間不能超越。

阿難！云何名為眾生世界？世為遷流，界為方位。汝今當知東西南北，東南、西南，東北、西北，上下為界，過去未來現在為世；方位有十，流數有三。一切眾生織妄相成，身中貿遷，世界相涉；而此界性，設雖十方，定位可明，世間祇目東西南北，上下無位，中無定方，四數必明與世相涉，三四四三，宛轉十二，流變三疊，一十百千，總括始終，六根之中各各功德，有千二百。

阿難！汝復於中，克定優劣，如眼觀見後暗前明，前方全明後方全暗，左右旁觀，三分之二統論所作，功德不全，三分言功，一分無德，當知眼唯八百功德；如耳周聽十方無遺，動若邇遙，靜無邊際，當知耳根，圓滿一千二百功德；如鼻齶聞通出入息，有出有入，而闕中交，驗於鼻根，三分闕一，當知鼻惟八百功德；如舌宣揚盡諸世間，出世間智，言有方分，理無窮盡，當知舌根，圓滿一千二百功德；如身覺觸，識於違順，合時能覺，離中不知，離一合雙，驗於身根三分闕一，當知身唯八百功德；如意默容，十方三世一切世間，出世間法，惟聖與凡無不包容，盡其涯際，當知意根，圓滿一千二百功德。

阿難！汝今欲逆生死欲流，返窮流根，至不生滅。當驗此等六受用根，誰合？誰離？誰深？誰淺？誰為圓通？誰不圓滿？若能於此，悟圓通根，逆彼無始織妄業流，得循圓通，與

不圓根日劫相倍，我今備顯六湛圓明，本所功德數量如是，隨汝詳擇其可入者，吾當發明令汝增進。十方如來於十八界，一一修行，皆得圓滿無上菩提，於其中間亦無優劣；但汝下劣未能於中，圓自在慧，故我宣揚，令汝但於一門深入，入一無妄，彼六知根一時清淨。」

阿難白佛言：「世尊！云何逆流深入一門，能令六根一時清淨？」

佛告阿難：「汝今已得須陀洹果，已滅三界眾生世間，見所斷惑，然猶未知，根中積生無始虛習，彼習要因修所斷得，何況此中生、住、異、滅，分齊頭數？今汝且觀現前六根，為一？為六？」

阿難！若言一者，耳何不見？目何不聞？頭奚不履？足奚無語？若此六根決定成六，如我今會，與汝宣揚微妙法門，汝之六根誰來領受？」

阿難言：「我用耳聞。」

佛言：「汝耳自聞，何關身口？口來問義，身起欽承，是故應知非一終六，非六終一，終不汝根，元一元六。阿難！當知是根，非一非六，由無始來顛倒淪替，故於圓湛，一六義

生。汝須陀洹，雖得六銷猶未亡一，如太虛空參合羣器，由器形異，名之異空，除器觀空，說空為一，彼太虛空，云何為汝成同不同？何況更名是一非一？則汝了知，六受用根亦復如是。由明暗等二種相形，於妙圓中黏湛發見，見精映色，結色成根，根元目為清淨四大，因名眼體如蒲萄朶，浮根四塵，流逸奔色；由動靜等二種相擊，於妙圓中黏湛發聽，聽精映聲，卷聲成根，根元目為清淨四大，因名耳體，如新卷葉，浮根四塵，流逸奔聲；由通、塞等，二種相發，於妙圓中黏湛發嗅，嗅精映香，納香成根，根元目為清淨四大，因名鼻體，如雙垂爪，浮根四塵，流逸奔香；由恬、變等，二種相參，於妙圓中黏湛發嘗，嘗精映味，絞味成根，根元目為清淨四大，因名舌體，如初偃月，浮根四塵，流逸奔味；由離、合等，二種相摩，於妙圓中黏湛發覺，覺精映觸，搏觸成根，根元目為清淨四大，因名身體，如腰鼓頰，浮根四塵，流逸奔觸；由生、滅等，二種相續，於妙圓中黏湛發知，知精映法，攬法成根，根元目為清淨四大，因名意思，如幽室見，浮根四塵，流逸奔法。

阿難！如是六根由彼覺明，有明明覺，失彼精了黏妄發光。是以汝今離暗離明，無有見體；離動離靜，元無聽質；無通無塞，嗅性不生；非變非恬，嘗無所出；不離不合，覺觸本無；無滅無生，了知安寄。汝但不循動、靜、合、離、恬、變、通、塞、生、滅、明、暗，如是十二諸有為相，隨拔一

根脫黏內伏，伏歸元真，發本明耀；耀性發明，諸餘五黏，應拔圓脫，不由前塵所起知見，明不循根，寄根明發，由是六根互相為用。

阿難！汝豈不知，今此會中阿那律陀，無目而見；跋難陀龍，無耳而聽；殞伽神女，非鼻聞香；驕梵鉢提，異舌知味；舜若多神，無身覺觸；如來光中，映令暫現，既為風質，其體元無；諸滅盡定，得寂聲聞，如此會中摩訶迦葉，久滅意根圓明了知，不因心念。阿難！今汝諸根若圓拔已，內瑩發光，如是浮塵及器世間，諸變化相，如湯銷冰，應念化成無上知覺。阿難！如彼世人聚見於眼，若令急合，暗相現前，六根黯然，頭足相類，彼人以手，循體外繞，彼雖不見，頭足一辨，知覺是同，緣見因明，暗成無見，不明自發，則諸暗相永不能昏，根塵既銷，云何覺明，不成圓妙。」

阿難白佛言：「世尊！如佛說言，因地覺心，欲求常住，要與果位，名目相應。世尊！如果位中，菩提、涅槃、真如、佛性、菴摩羅識、空如來藏、大圓鏡智，是七種名稱謂雖別，清淨圓滿，體性堅凝，如金剛王常住不壞；若此見聽，離於明、暗、動、靜、通、塞，畢竟無體，猶如念心，離於前塵，本無所有，云何將此畢竟斷滅，以為修因，欲獲如來七常住果？世尊！若離明、暗，見畢竟空，如無前塵，念自性滅，進退循環，微細推求，本無我心及我心所，將誰立因求

無上覺？如來先說湛精圓常，違越誠言，終成戲論。云何如來真實語者？惟垂大慈，開我蒙悞！」

佛告阿難：「汝學多聞，未盡諸漏，心中徒知，顛倒所因，真倒現前，實未能識，恐汝誠心，猶未信伏。吾今試將塵俗諸事，當除汝疑。」

即時，如來敕羅睺羅擊鍾一聲，問阿難言：「汝今聞不？」

阿難大眾俱言：「我聞。」

鍾歇無聲，佛又問言：「汝今聞不？」

阿難大眾俱言：「不聞。」

時，羅睺羅又擊一聲，佛又問言：「汝今聞不？」

阿難大眾又言：「俱聞。」

佛問阿難：「汝云何聞？云何不聞？」

阿難大眾俱白佛言：「鍾聲若擊則我得聞，擊久聲銷，音響雙絕，則名無聞。」

如來又敕羅睺擊鍾，問阿難言：「爾今聲不？」

阿難大眾俱言：「有聲。」

少選聲銷，佛又問言：「爾今聲不？」

阿難大眾答言：「無聲。」

有頃，羅睺更來撞鍾，佛又問言：「爾今聲不？」

阿難大眾俱言：「有聲。」

佛問阿難：「汝云何聲？云何無聲？」

阿難大眾俱白佛言：「鍾聲若擊，則名有聲，擊久聲銷，音響雙絕，則名無聲。」

佛語阿難及諸大眾：「汝今云何自語矯亂？」

大眾阿難俱時問佛：「我今云何名為矯亂？」

佛言：「我問汝聞，汝則言聞；又問汝聲，汝則言聲。惟聞

與聲，報答無定，如是云何不名矯亂？阿難！聲銷無響，汝說無聞，若實無聞，聞性已滅，同於枯木，鍾聲更擊，汝云何知？知有知無，自是聲塵或無或有，豈彼聞性，為汝有無？聞實云無，誰知無者？是故，阿難！聲於聞中自有生滅，非為汝聞聲生聲滅，令汝聞性為有為無。汝尚顛倒惑聲為聞，何怪昏迷以常為斷。終不應言，離諸動靜、閉塞、開通，說聞無性。如重睡人眠熟床枕，其家有人，於彼睡時擣練舂米，其人夢中聞舂擣聲，別作他物，或為擊鼓、或為撞鍾，即於夢時，自怪其鍾為木石響，於時忽寤，遙知杵音，自告家人：『我正夢時，惑此舂音將為鼓響。』阿難！是夢中人，豈憶靜搖、開閉、通塞？其形雖寐聞性不昏，縱汝形銷命光遷謝，此性云何為汝銷滅？以諸眾生從無始來，循諸色聲逐念流轉，曾不開悟性淨妙常，不循所常逐諸生滅，由是生生雜染流轉；若棄生滅守於真常，常光現前，根、塵、識心應時銷落，想相為塵、識情為垢，二俱遠離，則汝法眼應時清明，云何不成無上知覺？」

大佛頂如來密因修證了義諸菩薩萬行首楞嚴經卷第四

離婆離婆帝 求訶求訶帝 陀羅尼帝 尼訶囉帝
毗黎你帝 摩訶伽帝 真陵乾帝 娑婆訶（七遍）

南無喝囉怛那 哆囉夜耶 佉囉佉囉
俱住俱住 摩囉摩囉 虎囉 吽 賀賀
蘇怛拏 吽 潑抹拏 娑婆訶 (三遍)

深窮萬法 同異俱生 廣陳相續來無明
妙體覺真澄 同業摧懲 法眼應時清
南無楞嚴會上佛菩薩 (三唱)

願以此功德 莊嚴佛淨土 上報四聖恩 下濟六凡苦
所有法界眾 悉修菩提行 盡此一報身 同生極樂國